

ZAPISNIK
O RADU 21. RADNE SJEDNICE SKUPŠTINE KANTONA SARAJEVO ODRŽANE
28.i 29.03.2025.GODINE SA POČETKOM RADA U 10,00 SATI

Dvadeset i prvu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici su prilikom otvaranja prisustvovali 24 zastupnice i zastupnika, dok su se ostali priključili u toku sjednice. Sjednici nije prisustvovala zastupnica: Danijela Kristić.

U skladu s naprijed iznesenim, prisustvo zastupnika 21. Radnoj sjednici je bilo sljedeće:

SDA - STRANKA DEMOKRATSKE AKCIJE

1. Dević Mahir
2. Izetbegović Sebija
3. Kalem Adi
4. Kapidžić Faruk
5. Selmanović Faruk
6. Viteškić Smiljana
7. Zahiragić Haris

POLITIČKA ORGANIZACIJA "NAROD I PRAVDA"

1. Čampara Aljoša
2. Mehmedagić Mersiha
3. Okerić Elvedin
4. Pobrić Rusmir
5. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čičić Davor
3. Kapo Belma
4. Pekić Jelena
5. Petrović Kristina
6. Vikić – Musić Vedrana

POLITIČKA ORGANIZACIJA GRAĐANA "NAŠA STRANKA"

1. Bešlija Vildana
2. Handžić Vibor
3. Klarić Sanela
4. Melank Miomirka

STRANKA ZA BOSNU I HERCEGOVINU

1. Bandić Muamer
2. Gavrankapetanović-Smailbegović Fatima
3. Šaljić Jasmin

DEMOKRATSKA FRONTA

1. Hašimbegović Marijela
2. Pilav Ilijaz
3. Vujović Vedrana
4. Zuhrić Albin

POLITIČKA ORGANIZACIJA/INICIJATIVA “ZA NOVE GENERACIJE”

1. Marjanović Damir

SAMOSTALNI ZASTUPNICI

1. Hodžić Admela
2. Gaković Elza
3. Lemezan Redžo
4. Memić Arijana

U radnom dijelu sjednice, predsjedavajući je naglasio da prije prelaska na utvrđivanje dnevnog reda sjednice, a u skladu sa članom 158. Stav (2) Poslovnika Skupštine Kantona Sarajevo, o prijedlozima za donošenje zakona po skraćenom postupku, Skupština odlučuje kao u prethodnom pitanju prije utvrđivanja dnevnog reda sjednice.

S tim u vezi, predsjedavajući je pozvao predstavnika predlagača, ministra Omera Osmanovića, da obrazloži razloge za donošenje pretresanje Prijedloga Zakona o izmjenama i dopunama Zakona o dopunskim pravima boraca branitelja Bosne i Hercegovine po skraćenom postupku.

Nakon izlaganja ministra Osmanovića, predsjedavajući je otvorio raspravu, te pošto nije bilo prijavljenih diskutanata, istu je zaključio i pozvao zastupnike da pristupe izjašnjavanju da se Prijedlog Zakona o izmjenama i dopunama Zakona o dopunskim pravima boraca branitelja Bosne i Hercegovine donese pretresa po skraćenom postupku.

Na osnovu rezultata glasanja konstatovano je da je Skupština jednoglasno (s 26 glasova „za“) usvojila prijedlog da se Zakon o izmjenama i dopunama Zakona o dopunskim pravima boraca branitelja Bosne i Hercegovine, donese pretresa po skraćenom postupku.

Potom je predsjedavajući dao riječ premijeru Nihadu Uku, kako bi obrazložio razloge za donošenje pretresanje Zakona o izmjenama i dopuni Zakona o socijalnoj zaštiti, zaštiti civilnih žrtava rata i zaštiti porodice sa djecom po skraćenom postupku.

Nakon izlaganja premijera Uka, predsjedavajući je otvorio raspravu.

U diskusiji su učestvovali zastupnici: *Mahir Dević, Marijela Hašimbegović, Jelena Pekić, Faruk Selmanović i Muamer Bandić.*

Poslovničku intervenciju su imali zastupnici: *Belma Kapo, Faruk Selmanović i Mahir Dević.*

Ispravku krivog navoda su imali zastupnici: *Samir Avdić, Vibor Handžić, Albin Zuhrić i Mahir Dević.*

U međusobnom repliciranju su učestvovali zastupnici: *Davor Čičić – Jelena Pekić, Mahir Dević – Muamer Bandić, Davor Čičić – Muamer Bandić, Vildana Bešlija - Muamer Bandić, Elvedin Okerić – Albin Zuhrić, Muamer Bandić – Albin Zuhrić.*

Zaključivi diskusije, predsjedavajući je pozvao zastupnike da pristupe izjašnjavanju o prijedlogu da se Zakon o izmjenama i dopuni Zakona o socijalnoj zaštiti, zaštiti civilnih žrtava rata i zaštiti porodice sa djecom donese pretresa po skraćenom postupku.

Na osnovu rezultata glasanja, konstatovano je da je Skupština većinom glasova (s 20 glasova „za“ i 9 glasova „protiv“) usvojila prijedlog da se Zakon o izmjenama i dopuni Zakona o socijalnoj zaštiti, zaštiti civilnih žrtava rata, zaštiti porodica sa djecom donese pretresa po skraćenom postupku.

Nadalje, prešlo se na utvrđivanje dnevnog reda sjednice.

Predsjedavajući je istakao da je Prijedlog dnevnog reda 21. Radne sjednice Skupštine Kantona Sarajevo utvrdio Kolegij Skupštine na sjednicama održanim 19. i 24.03.2025. godine.

Nakon čitanja dnevnog reda, predsjedavajući je pozvao zastupnike da se izjasne o istom.

Na osnovu rezultata glasanja, konstatovano je da je Dnevni red 21. Radne sjednice Skupštine Kantona Sarajevo usvojen većinom glasova (s 20 glasa „za“, 6 „protiv“ i 3 „suzdržana“), i isti glasi:

1. Poslanička/zastupnička pitanja inicijative i odgovori;
2. Prijedlog Budžeta Kantona Sarajevo za 2025.godinu;
3. Prijedlog Zakona o izvršavanju Budžeta Kantona Sarajevo za 2025. godinu;
4. Prijedlog Zakona o izmjenama i dopunama Zakona o dopunskim pravima boraca-branitelja Bosne i Hercegovine-skraćeni postupak;
5. Prijedlog Zakona o izmjenama i dopuni Zakona o socijalnoj zaštiti, zaštiti civilnih žrtava rata i zaštiti porodice sa djecom-skraćeni postupak;
6. Prijedlog Odluke o imenovanju Odbora za žalbe javnosti Skupštine Kantona Sarajevo;
7. Prijedlog Odluke o davanju saglasnosti Zavodu za izgradnju Kantona Sarajevo za pokretanje postupka otpisa zakonskih zateznih kamata uz obavezu izmirenja glavnog duga i troškova sudskog postupka.

Predsjedavajući je napomenuo da su zastupnici, također, uz poziv za sjednicu dobili i sljedeći informativni materijal:

- Izvještaj – „Funkcionalni pregled upravljanja kvalitetom zraka u Kantonu Sarajevo“, koji su sačinili domaći i međunarodni stručnjaci pod vođstvom i uz finansijsku podršku Svjetske banke;
- Informacija o provođenju Zakona o prijavljivanju i postupku provjere podataka o imovini nosioca javnih funkcija u Kantonu Sarajevo;
- Izvještaj o radu Policijskog komesara Uprave policije Ministarstva unutrašnjih poslova Kantona Sarajevo za vremenski period april-juni 2024. godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec novembar 2024.godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec decembar 2024. godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za 2024.godinu
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec januar 2025. godine.

TOK SJEDNICE

Realizacija prve tačke dnevnog reda počela je u 10 sati i 25 minuta.

Predsjedavajući je otvorio tačku dnevnog reda i dao riječ prvom prijavljenom zastupniku.

Zastupnik Muamer Bandić je podnio sljedeće (citiramo): „Imam jedno zastupničko pitanje. Molim da mi Služba za skupštinske poslove Kantona Sarajevo tražim da mi dostave podatke o prisustvu premijera Kantona Sarajevo i ministara u Vladi Kantona Sarajevo sjednicama Skupštine Kantona Sarajevo, sjednicama Kolegija Skupštine Kantona Sarajevo, kao i sjednicama svih radnih tijela Skupštine Kantona Sarajevo u 2023., '24. i '25. godini“.

Zastupnica Fatima Gavrankapetanović-Smailbegović je podnijela sljedeće (citiramo): „Ja danas podnosim inicijativu ministru zdravstva dr Enisu Hasanoviću da uspostavi sistem da plaćanje deficitarnih usluga privatnim ustanovama ide direktno preko Zavoda zdravstvenog osiguranja. Naime, ako se pacijentima ne može pružiti usluga ili se predugo čeka na pružanje usluge u javnoj zdravstvenoj ustanovi, pacijenti odlaze u privatnu ordinaciju gdje im troškove refundira Zavod zdravstvenog osiguranja, ipak pacijenti moraju platiti svoj novac i čekati na refundaciju. Mnogi nisu u mogućnosti da plate taj novac te vas molim da se uspostavi sistem da naplata ide iz računa Zavoda zdravstvenog osiguranja direktno na račun privatne zdravstvene ustanove“.

Zastupnik Samir Avdić je podnio sljedeće (citiramo): „S obzirom da je Kantonalni zavod za zaštitu kulturno historijskog i prirodnog naslijeđa Kantona Sarajevo u periodu, samo u periodu 2023 do '24. godine izradio 15 prijedloga prethodne zaštite za dobra baštine za koja za koja posjedujem ja ličnu listu, ali ne i ostali zastupnici, a prema Zakonu o zaštiti kulturne baštine u Kantonu Sarajevo, član 16., Skupština Kantona Sarajevo je dužna da razmatra dostavljene prijedloge i prema članu 18 donosi odluku o stavljanju dobara zaštite pod zaštitu. Ja iniciram i prema Zavodu i prema Ministarstvu kulture i sporta Kantona Sarajevo da u saradnji pripremi listu prijedloga prema Skupštini Kantona Sarajevo. I ovdje ne mislim samo na prošlogodišnju prošlogodišnju listu koju je izradio Kantonalni zavod, već listu svih onih spomenika baštine koji su predloženi od strane Zavoda posljednjih godina, a nisu se našli na sjednici Skupštine, da bi ih mi, u skladu sa svojim nadležnostima, i proglasili zaštićenim. Ovo radim, odnosno iniciram iz razloga što dolazi do da kažem, neke vrste zbunjenosti. I imali smo baš nedavno na Općiskom vijeću Ilidža jedan predmet u vezi sa jednom građevinom za koju ja lično smatram, odnosno imam informaciju da je na Listi prijedloga Zavoda kao zaštićeni zaštićena baština, odnosno ambijentalno naslijeđe, dok neki drugi subjekti tvrde da ne postoji teret nad tom građevinom iz razloga što Skupština nije potvrdila, odnosno usvojila te prijedloge Zavoda. Iz tog razloga tražim od Ministarstva i Zavoda da nam pripreme Listu svih, još jednom ponavljam svih prijedloga Zavoda i dostavi ovaj u budućem radu, da bismo mi na skupštini ih i proglasili baštinom i na taj način uredili tu oblast i zaštitili svoje naslijeđe da ne dolazi do tih, da kažem različitih tumačenja od strane različitih subjekata. I jedno zastupničko pitanje, zastupničko pitanje prema Ministarstvu privrede. Tražim informaciju o detaljima, odnosno da bi se dostavi koncesioni ugovor između Ministarstva privrede Kantona Sarajevo i privrednog subjekta Terme Ilidža znači hotelski kompleks Terme Ilidža koji koristi koncesiono dobro termalnu vodu. To tražim iz razloga što smo kolegica Belma Kapo, te kolegice Kristić i Memić već u jednom procesu i u razgovorima sa ljudi iz Instituta za rehabilitaciju na Ilidži koji ne mogu, između ostalog, i da koriste izvor termalne vode, da bi uz našu pomoć eventualno pokrenuli i liječenje termalnom vodom u bazenu. Znači, tražim da im se dostavi ugovor između Ministarstva privrede i privrednog subjekta Terme Ilidža.“.

Zastupnica Belma Kapo je podnijela sljedeće (citiramo): „Ja podnosim inicijativu prema Ministarstvu odgoja i obrazovanja Kantona Sarajevo. Naime, Ministarstvo je izdalo pravilnik, jako dobar pravilnik u kojem je detaljno opisan Pravilnik o ishrani učenika u osnovnim i srednjim školama u Kantonu Sarajevo, gdje je stvarno sve detaljno opisano i između ostalog u članu 11. su opisane i posebna ishrana na mališane koji imaju intoleranciju ili npr. Celijakiju. Međutim, ono što mi sada imamo u nekim od škola jeste da oni nisu u mogućnosti da obezbijedi takvu vrstu ishrane u produženim produženom boravku za djecu npr. Koja imaju Celijakiju. Celijakija je zato teška bolest za mališane u nekoj dobi do 10 godina, kada oni još uvijek nisu dovoljno svjesni šta smiju, a šta ne smiju pojesti. Tako da imam jedan dopis, a vjerujem i da se majka obratila samom Ministarstvu, riječ je o školi Edhem Mulabdić, gdje bi trebao da krene u prvi razred jedan dječak koji ima jedan od najtežih oblika Celijakije. U Kantonu Sarajevo ima oko 30 djece koji i pohađaju osnovnu školu sa ovakvim problemima neko u većoj mjeri, neko u manjoj, gdje je škola, direktorica škole je odgovorila da ta škola nije u mogućnosti da obezbijedi boravak, odnosno ishranu produženom boravku za dijete sa ovakvim oblikom Celijakije, pa bih ja zamolila ministricu da ministarstvo pomogne na način da barem postoji neki spisak ili škola u Kantonu Sarajevo kod u koje djeca mogu bezbjedno ići, koja imaju Celijakiju, jer bilo koji kontakt djece koja moraju biti na bezglutenskoj ishrani sa glutenom može izazvati zaista štetne posljedice za djecu. Pa da barem imamo 3 škole u Kantonu Sarajevo na 3 lokacije u koje zasigurno mogu ići ta djeca, a da ne dođu u situaciju. Da, mogu se dogoditi neke pojave koje nisu dobre po tu djecu. Isto to se odnosi na vrtiće, dobro bi bilo da roditelji djece koja imaju Celijakiju ili intoleranciju na hranu imaju prednost kroz EMIS sistem upisa u vrtiće koje imaju obezbijeđene uslove za takvu vrstu ishrane. Pa evo, molim vas, ako možete, da vidimo koji je najbolji način da prije naredne školske godine za ovu djecu obezbijedimo najmanjenje tri produžena boravka u Kantonu Sarajevo u kojima oni mogu bezbjedno boraviti i jest hranu koja je njima propisana jer je toj djeca hrana lijek. Ja ovdje čak imam jednu sliku koja pokazuje, evo neću sada pokazivati, ali ću ministrici predati da vidite koliko je u stvari to stanje vrlo teško kada dijete dođe u kontakt sa hranom ili sa predmetima sa kojima ne smije biti u dodiru. Mi ćemo svakako iz Doma naroda pokrenuti druge procedure u kojim ćemo tražiti da roditelji djece koja imaju određene stepene Celijakije budu zaštićeni na način da roditelj takve djece do 10 godina starosti, dok oni nisu još uvijek potpuno svjesni šta smiju, a šta ne smiju, imaju prednost u načinu rada. Odnosno da i oni imaju mogućnost da rade na pola radnog vremena. Uskoro će ići novi Zakon o radu pa vjerujem da ćemo uspjeti da tu uradimo i neke izmjene koje će olakšati roditeljima ove djece“.

Zastupnica Vedrana Vujović je podnijela sljedeće (citiramo): „Ja imam dva zastupnička pitanja koja ću uputiti ministrici za odgoj i obrazovanje Naidi Hota-Muminović. Odlukom o kriterijima za upis učenika u prvi razred srednjih škola u Kantonu Sarajevo članom 17 propisan je potreban broj bodova za upisu u srednje škole koji definiše minimalni broj bodova koji je učenik trebao ostvariti prema utvrđenim kriterijima da bi se upisao prvi razred određene srednje škole u Sarajevu. S tim u vezi, moja dva pitanja glase: prvo, po kojim parametrima, mjerilima i kriterijima su utvrđeni minimalni iznosi bodova potrebnih za upis određenu vrstu srednje škole i drugo pitanje koja je svrha neujednačenosti broja bodova za pojedine vrste srednjih škola i šta se tim želi postići, imajući u vidu da bodovi za upis u bilo koju četverogodišnju srednju školu nisu isti. Ja sam svjesna da ova praksa postoji dugi niz godina, ali u neravnopravan položaj dovodi srednje strukovne i četverogodišnje škole u odnosu, na primjer gimnazije i ovo nije novina. Stoga od ministrice za odgoj i obrazovanje, ukoliko je mogućnosti, tražim usmeni odgovor, ali svakako pismeni i na osnovu kojeg ću formirati svoje dalje inicijative. Hvala lijepo“.

Zastupnica Jelena Pekić je podnijela sljedeće (citiramo): „Evo, ja ću iskoristiti svoje pravo da postavim zastupničko pitanje. Moje zastupničko pitanje je upućeno premijeru Vlade Kantona Sarajevo i odnosi se na Zakon o upravljanju zajedničkim dijelovima zgrada. Imam svakodnevne upite od strane građana vezano za funkcionalnost, hajda da kažem ovog Zakona,

posebno kada se desi obrušavanje fasada, što smo svjedočili u posljednjem vremenskom periodu i zaista imam na neki način i molbu i pitanje prema premijeru da dokle je novi tekst Zakona o upravljanje zajedničkim dijelovima zgrada, jer očigledno da nešto sa ovim Zakonom ne funkcioniše i da ovaj sistem koji trenutno imamo u Kantonu Sarajevo nije dobar s obzirom na sve situacije koje smo imali u prethodnom periodu i zaista smatram da se ovaj Zakon treba u potpunosti mijenjati, osmisliti novi i bolji model koji će biti u interesu kako ljudi koji žive u stanovima, odnosno u ovom kolektivnom obliku stanovanja, ali tako i šire društvene zajednice. I samo želim da napomenem da je kolega Selmanović prošlu sjednicu ima upravo jedno zastupničko pitanje ili inicijativu koja se odnosila na ulicu Gandijevu ulicu na području Dobrinje i gdje se tražila pomoć resornog ministarstva u rješavanju onih problema koji ovaj ljudi koji živi na području te ulice u datim zgradama imaju takvu vrstu problema“.

Zastupnik Jasmin Šaljić je podnio sljedeće (citiramo): „I pitanja i inicijativa su iz istog resora, iz iste oblasti. Radi se o Zakonu o koncesijama, pitanje je za premjera Uka ili koga on ovlasti od resornih ministara, pošto je Zakon o koncesijama obuhvata više resora, zašto je u Kantonu Sarajevo prilikom zaključivanja ugovora o koncesiji, pored redovne koncesionalne naknade za korištenje koja se izražava u procentima i odnosi se na godišnji bruto prihod nastao korištenjem javnih dobara i prirodnih bogatstava koji se obračunava po mjernim jedinicama: tona, metar, kvadratni metar, kubni i itd. uvedena i jednokratna naknada za koncesije na ugovore od 30 godina i više, koja se obračunala na cijeli ugovorni period unaprijed. Ova naknada ne postoji u entitetu Republika Srpska. Ova naknada, jednokratna, dovela je naše privrednike u veoma težak i podređen položaj jer se ova naknada obračunava u milionima. Drugo pitanje, koji je razlog pa smo sam materijal za sve projekte vezano za saobraćaj, komplet infrastrukturu uzimali iz kamenoloma Lapišnica, Mokro, kod Trnova Bijele vode, pored naših pet kamenoloma, ne znam, Zovik, Rakovica itd.? I jedna inicijativa. Upućujem inicijativu prema Ministarstvu financija Kantona Sarajevo koje vodi jedinstveni Registar dodijeljenih koncesija na području Kantona Sarajevo i jedinstveni Registar svih zaključenih ugovora o koncesijama u Kantonu Sarajevo. Kao zastupnik tražim da mi dostavite podatak koliko ste, koliko je u proteklih 5 godina zaključeno, ugovora o koncesiji u Kantonu Sarajevo i koliko je bilo zahtjeva za dodjelu koncesije na području Kantona Sarajevo u zadnjih 5 godina. Ovo ću obrazložiti inicijativu. Radi se o tome da smo u proteklih 5 godina, evo uzet ćemo u zadnju 2024 godinu, mi kao Kanton naš Budžet imali gubitak po nekim procjenama $\pm 5\%$ preko 60 000 000 maraka, jer smo komplet komplet, materijal za infrastrukturu za izgradnju stambenih objekata, za transversalu, čak i ovaj za prugu uvezli iz Krupca, iz Lapišnice, iz Mokrog, a uporedo zatvorili smo 5 naših kamenoloma. Ja ne znam kako ovo reći, u diskusiji ću se malo drugačije, osim da je neka vrsta pogodovanja. Toliko za sada, a u diskusiji ću otvoriti ovu temu. Znači, mi smo se zadužili, planiramo zadužiti, odnosno vi, 100 000 000 maraka, ako dodamo i asfaltnu bazu iz ovih kamenoloma, to je otprilike ta cifra koju se mi planiramo zadužiti da je oštećen Kanton Sarajevo, čak i materijal iskopani vozimo u entitet Republika Srpska i plaćamo po kubiku, ne znam između 3 i 5 maraka od ovolikog Kantona, ovoliko mi ne možemo ni deponiju za iskopani materijal da imamo. Znači u kompletu”.

Zastupnica Marijela Hašimbegović je podnijela sljedeće (citiramo): „Za današnju sjednicu pripremila sam 5 inicijativa i 2 pitanja, ovom prilikom prezentirati ću jedno pitanje, jednu inicijativu. Pitanje je upućeno Ministarstvu privrede Kantona Sarajevo i KJP ZOI'84. Inspirisana mnogim povredama našim skijaša na našim skijalištima i jednim fatalnim ishodom koji se desio, dakle upućujem zastupničko pitanje na temu sigurnosti skijaša i protokola spašavanja. U vašem odgovoru očekujem da se referišete na sljedeće: da li su članovi spasilačke službe koji su angažovani od strane KJP ZOI' 84 zadovoljili neophodne standarde za obavljanje ovog posla? Na koji način su angažovane spasilačke službe? KJP ZOI' 84 je naručio Elaborat o bezbjednosti na skijalištu i zašto je naručen ako se ne primjenjuje? Zašto se spasilačka služba

koristi kao ski patrola? Da li posjedujete informacije i dokaze o uspostavljenim mehanizmima rada koji uključuje sve aspekte sigurnosti i operativnog djelovanja na skijalištu od strane angažovane spasilačke službe? Koliko je dežurnih spasilačkih ekipa prisutno na skijalištima Bjelašnice i Igmana? Da li ste zaprimili Izvještaj o radu od strane spasilačke službe? Također, inicijativa upućena Ministarstvu pravde i uprave Kantona Sarajeva i Kantonalnoj upravi za inspeksijske poslove. Upućujem inicijativu da se preispita okolnost u kojem službeno lice koje obavlja poslove glavnog inspektora u Kantonalnoj upravi za inspeksijske poslove u Odjelu inspektorata rada, zaštite na radu i socijalne zaštite neovlašteno koristi službene oznake na privatnom vozilu. Informacije o ovom slučaju stigla je na više adrese i radi se o uposleniku Seadu Čupini. Obzirom da su radnje neovlaštenog isticanja službenih oznaka na privatnom vozilu krivično djelo koje propisano članom 369 Krivičnog zakona Federacije Bosne i Hercegovine zahtijevam hitnu reakciju po ovom pitanju, kao i informaciju o svim postupcima koji su poduzeti radi utvrđivanja postojanja naprijed navedenog krivičnog djela”.

Zastupnik Faruk Selmanović je podnio sljedeće (citiramo): „Danas imamo pet pitanja i jednu inicijativu, pa ovo sam prosljedio kolegama iz službe pa ću vam pročitati 2 pitanja i jednu inicijativu. Prvo pitanje upućujem Vladi Kantona Sarajeva, Ministarstvu zdravstva Kantona Sarajeva i Zavodu zdravstvenog osiguranja Kantona Sarajeva. Zašto, da li je tačno i ako je tačno, zašto svi lijekovi sa pozitivne liste nisu dostupni u Kantonu Sarajeva, pa su pacijent prisiljeni da iste kupuju u drugim Kantonima, a Zavod im ne dozvoljava refundaciju? Da li iko vrši reviziju dostupnosti lijekova u apotekama u Kantonu Sarajeva? I šta ako lijek nije dostupan u Kantonu Sarajeva, a na pozitivnoj je listi? Drugo pitanje odnosi se, odnosno upiti ću prema Ministarstvu pravde i uprave Kantona Sarajeva. Cijeneći da su bili najavljeni građevinski radovi na zgradi koje je do sada koristio KPZ Sarajeva objekat Miljacka, odnosno da je u toku rekonstrukcija Kantonalnog suda i Općinskog suda Sarajeva koji su preuzeli navedeni objekat, postavljam pitanje ministrici pravde i uprave Kantona Sarajeva, gdje su sada smješteni pritvorenici koji su boravili u tom objektu, da li su u pritvorskoj jedinici KZKP Sarajeva na Igmanu ili su u KPZ Zenica? Inicijativa. Inicijativu upućujem Vladi Kantona Sarajeva, Ministarstvu zdravstva Kantona Sarajeva i Zavodu zdravstvenog osiguranja Sarajeva da napravi javno dostupnu bazu lijekova koji su dostupni u apotekama u Sarajevu, sa naznakom na kojoj su listi i koje su količine dostupne i u kojoj tačno na apoteci. Građani Kantona Sarajeva su ogorčeni na trenutno stanje i ne znaju u kojoj apoteci je dostupan koji lijek, pa su, prisiljeni da sami obilaze apoteke u potrazi za lijekovima. Na ovaj način lijekovi bi bili dostupni u javnoj bazi te pacijenti sami jednim klikom bi mogli vidjeti gdje je dostupan lijek, ali isti kako bi mogli vidjeti da neki od lijekova, iako su recimo na pozitivnoj listi, nisu dostupni pa da se mogu na vrijeme pripremiti. Mislim da ovo ne bi trebalo biti posebno komplikovano, cijeneći da su sve ovi podaci već digitalizovani“.

Zastupnica Vedrana Vikić je podnijela sljedeće (citiramo): „Ja imam jedno pitanje, inicijativu za ministra zdravstva gospodina Hasanovića. Podnosim, dakle, inicijativu, evo ili pitanje, iako sam u potpunosti svjesna da ovo nije u nadležnosti Ministarstva Kantona Sarajeva, već isključiva nadležnost Federalnog ministarstva zdravstva i Federalnog zavoda ali vas molim u ime svih građanki kojim je, nažalost, dijagnosticiran zločudni agresivni rak dojke, a koji nije na listi lijekova i koji daje odlične rezultate. Radi se o lijeku Kejtruda da se isti pokuša obezbijediti. Troškovi jedne doze iznose čak od 8 do 11 000 konvertibilnih maraka. Potrebno je 8 doza što iznosi nekih 80 do 90 000 konvertibilnih maraka. Dakle, još jednom naglašavam i zahvaljujem se unaprijed na svim aktivnostima koje kontinuirano poduzima Ministarstvo zdravstva Kantona Sarajeva, ali evo i kao građanka i kao zastupnica u Kantonu Sarajeva, smatram našom obavezom da pokušamo učiniti sve iznaći način da pomognemo našim građankama u jednom od najtežih trenutaka, jer radi se o borbi za život na način kako smo pomogli i onkološkim pacijentima. Dakle, da spriječimo da nam umiru mladi ljudi, žene. Evo, ukoliko Ministarstvo zdravstva

Kantona Sarajevo može bilo šta učiniti po ovom pitanju, evo u ime građana i u svoje ime se zahvaljujem“.

Zastupnica Elza Gaković je podnijela sljedeće (citiramo): „Ja ću danas podnijeti jednu inicijativu i jedno pitanje zajedno sa kolegicama Mehmedagić i Klarić. Pitanje ćemo uputiti prema Centru naprednih tehnologija, a vezano je za tehnološko rješenje prečistača procjednih voda iz trupe deponije Smiljevići. U jednoj od posjeta ovom Centru nekako dobili smo pozitivne povratne informacije vezano za moguće rješenje koje će zaista biti adekvatno rješenje kada je u pitanju ova problematika koja znamo do 2011. godine apsolutno ne funkcioniše i van upotrebe je. Evo, od svih tih silnih godina i dan danas nemamo to instalirano onaj postrojenje i zaista i Kantonu Sarajevo, a i šire Nanose se nesagledive zdravstvene i ekološke posljedice. S tim u vezi, pitanje znači upućujemo prema Centru naprednih tehnologija, da li su u mogućnosti uraditi nam projektnu dokumentaciju za instalaciju tehnološkog rješenja prečistača procjednih voda iz trupa deponije? Inicijativa. Također upućujem sa kolegicama Mehmedagić i ovaj Klarić i odnosi se na izolaciju vodika iz hidrogena, koja je zapravo budućnost. I znamo da zemlje u regionu i u Europi i u svijetu zaista teže ovome. I to je samo svrha s ciljem energetske nezavisnosti u momentima u kojima se nalazimo. Također, pri obilasku u Centru naprednih tehnologija dobili smo uvjerenje da ovi vrijedni ljudi, kojih ima jako malo stručnih, zapravo njima treba pojačati kapacitiranost kada je u pitanju stručna strana, da bi zaista nam mogli omogućiti izlazak, odnosno izolaciju hidrogena iz vodika, što je zaista jedan veliki i kompleksan proces. Također, ovu inicijativu, kako smo i naglasili, upućujemo prema Centru naprednih tehnologija, prema Ministarstvu privrede i Ministarstvu komunalne privrede, čisto da se uradi cost benefit analiza i sve ono što se zove osvrt na ovu jednu zaista tehnologiju koja je budućnost svijeta. Znamo da je skupa, znamo da je u ovom momentu možda neshvatljiva, ali znamo i da je budućnost“.

Zastupnica Admela Hodžić je podnijela sljedeće (citiramo): „Upućujem inicijativu Ministarstvu zdravstva Kantona Sarajevo i Ministarstvu komunalne privrede i infrastrukture prostornog uređenja, građenja i zaštite okoliša Kantona Sarajevo da se obezbijede sredstva iz vodnih naknada i drugih sredstava za provođenje kontrole zdravstvene ispravnosti vode za piće sa lokalnih vodovoda kojima ne upravljaju javna komunalna preduzeća, a što je i propisano Zakonom o vodama Kantona Sarajevo. Obrazloženje: sve češće se dešava da vode iz lokalnih vodovoda neispravna za piće, prema onome što nalaže Pravilnik o zdravstvenoj ispravnosti vode za piće Bosne i Hercegovine i da kontrola ove vode nije usuglašena sa procedurama ovog Pravilnika. Ovaj problem najčešće imamo sa vodom iz lokalnih vodovoda, a kojima ne upravljaju javna komunalna preduzeća, kao što su Općina Hadžići, Općina Vogošća i drugih općina Kantona Sarajevo. Član 7. Ovog Poslovnika provjeru zdravstvene ispravnosti vode namijenjene javnom vodosnabdijevanju vrše nadležni inspektorati entiteta i Brčko distrikta Bosne i Hercegovine, preko zavoda i Instituta za javno zdravstvo entiteta i Brčko distrikta. Potrebno je redovno vršiti kontrolu kvaliteta vode sa lokalnih izvorišta prema putem Zavoda za javno zdravstvo, sve radi očuvanja zdravlja korisnika, a monitoring zdravstvene ispravnosti vode za piće vrši se također na osnovu Pravilnika o zdravstvenoj ispravnosti vode za piće od strane laboratorije Javne ustanove Zavoda za javno zdravstvo Kantona Sarajevo, za koje treba izdvojiti određena sredstva. Prema Zakonu o vodama Federacije Bosne i Hercegovine, prikupljene vodne naknade raspoređuju se na sljedeći način: nadležnoj agenciji za vode 40 %, u korist budžeta Kantona 45 % i u korist Fonda za zaštitu okoliša 15 %. Dakle od ukupnog prikupljenih vodnih naknada 45 % sredstava pripada budžetu Kantona koja su isključivo namjenska sredstva i raspoređuju se na Ministarstvo komunalne privrede, infrastrukture, prostornog uređenja, građenja i zaštite okoliša Kantona- Sarajevo, u čijoj je nadležnosti vodosnabdjevanje i odvodnja otpadnih voda 50 % i na Ministarstvo privrede Kantona Sarajevo za regulaciju riječnih korita 50 %. Shodno tome, Ministarstvo komunalne privrede, infrastrukture prostornog uređenja, građenja i zaštite okoliša, u čijoj je nadležnosti vodosnabdjevanje, treba u 25. godini izdvojiti dio sredstava za provođenje kontrole zdravstvene

ispravnosti vode za piće na svim lokalnim izvorima koja trenutno nisu pod kontrolom javnih komunalnih preduzeća. Takvih izvorišta na području Kantona Sarajevo ima znatan broj i sa njih se snabdijeva veliki broj stanovnika i to im je jedina mogućnost opskrbe pitkom vodom. Ostalo ću dostaviti u pisanoj formi obzirom da je obrazloženje opširnije”.

Zastupnik Mahir Dević je podnio sljedeće (citiramo): „Pokrećem inicijativu prema ministru zdravstva Kantona Sarajevo da se organizira ili tematska sjednica Skupštine Kantona Sarajevo vezana za stanje u zdravstvu, prevashodno mislim na stanje u Domovima zdravlja Kantona Sarajevo, pa evo ako hoćete i stanje u Kliničkom centru Univerziteta u Sarajevu ili barem da nam pripremite jednu širu informaciju koju bismo mogli staviti kao tačku dnevnog reda. Obrazloženje navedene inicijative i vi ste ministre svjedoci da je evo SDP već dva puta mijenjao direktora Doma zdravlja, čini mi se postavio jel trećeg čovjeka prije nekih možda ne znam mjesec, dva dana i sami ste nam ovdje u obrazloženju kazali da tamo stvari ne funkcionišu, ali ono s čime se građani svakodnevno susreću je jedan potpuni kolaps prevashodno u Domovima zdravlja. Pozdravljam, naravno, vaš angažman u smislu da se angažuju doktori sa biroa i da se svi zaposle. Međutim, očigledno da je to stvar koja na terenu ne funkcionira na najbolji način. Pa evo ili da vi organizirate tematsku sjednicu iz oblasti zdravstva, pa da se priča šire i o Domovima zdravlja, Kliničkom centru, pa ako hoćete i u Općoj bolnici i nekim drugim ustanovama iz oblasti zdravstvene zaštite ili barem tačku dnevnog reda informaciju prema Kolegiju da možemo postaviti, da možemo ovaj diskutovati, jer mi kao zastupnici nemamo drugog načina da ukažemo na ovaj sve probleme s kojim se susreću građani. Također, nemam više inicijativa, jel poslovnički mi to nije ni moguće, barem danas javno. Pitanja za ministra finansija, uzimajući u obzir aktualnost teme, a ona je usvajanje Budžeta Kantona Sarajevo za 2025. godinu, molim vas ministre, da u usmenoj formi, vrlo eksplicitno i jasno prenesete informaciju prema građanima Kantona Sarajevo koliko je deficit u Budžetu Kantona Sarajevo do, uključujući i danas, znači koliki je deficit, koliko smo dužni u Kantonu Sarajevo, evo u '25. godini, uključujući mjesec mart. To je jedna stvar i druga stvar da nam tačno odgovorite bez imalo umotavanja, zamotavanja, ja sam postavljao ta pitanje prema Ministarstvu finansija, dobio sam određenu vrstu, ajde da kažem, djelimičnog odgovora, znači odgovorite nam na pitanje također, usmeno tražim sada odgovor, pretpostavljam da te podatke imate spremne za budžet, ali kao predpitanje za budžet, pošto ne možemo ta pitanja postavljati jer ste to poslovnički uništili, koliko je tačno vlast trojke zadužila Kanton Sarajevo do danas u svim fazama realizacije? I ono što je u planu i ono što je u realizaciji i ono što još nije realizovano? Znači, o koliko miliona KM se radi jer je to informacija koju imaju pravo da imaju i zastupnici u Skupštini Kantona, pa da ne kažem, i svi građani u Kantonu Sarajevo jer te kredite će vraćati naša unučad, vjerovatno ovako kako ste počeli. Znači, deficit s jedne strane i s druge strane, koliko je tačno eksplicitno kreditno zaduženje, uključujući Plan u budžetu za 25. godinu, ne samo što ste realizirali, završavam kolegice, samo da ovu rečenicu dovršim, znači, uključujući i budžet kako je planirano za '25. godinu. Zamolit ću vas ova dva pitanja da mi jasno obrazložite u usmenoj formi“.

Nakon iscrpljene liste prijavljenih za pitanja i inicijative, odgovore na postavljena pitanja su ponudili: *ministar zdravstva, Enis Hasanović, ministrica pravde i uprave, Darja Softić-Kadenić, premijer Nihad Uk i ministar finansija, Afan Kalamujić.*

Realizacija tačke dva.

AD-2. PRIJEDLOG BUDŽETA KANTONA SARAJEVA ZA 2025. GODINU

Zastupnici su materijal dobili uz poziv za sjednicu. Uvodne napomene u ime predlagača, podnijeli su *premijer, Nihad Uk i ministar finansija, Afan Kalamujić.*

Dopredsjedavajuća Jelena Pekić, koja je u međuvremenu preuzela predsjedavanje sjednicom, je dala pauzu u trajanju od sat vremena, koju su zastupnici podržali većinom glasova (s 21 glas „za“).

NASTAVAK NAKON PAUZE

U nastavku nakon pauze, predsjedavajući Okerić je otvorio diskusiju.

U diskusiji su učestvovali zastupnici: *Marijela Hašimbegović, Smiljana Viteškić, Elvis Vreto, Vedrana Vujović, Mahir Dević, Faruk Selmanović, Jasmin Šaljić, Muamer Bandić, Adi Kalem, Faruk Kapidžić, Albin Zuhrić, Miomirka Melank, Haris Zahiragić, Redžo Lemezan, Samir Avdić, Jelena Pekić, Belma Kapo, Rusmir Pobrić, Damir Marjanović i Kristina Petrović.*

U međusobnom repliciranju su učestvovali zastupnici: *Samir Avdić - Marijela Hašimbegović, Redžo Lemezan – Vedrana Vujović, Vedrana Vujović – Mahir Dević, Marijela Hašimbegović – Mahir Dević, Davor Čičić – Mahir Dević, Miomirka Melank – Faruk Selmanović, Vedrana Vikić-Musić – Muamer Bandić, Elvedin Okerić – Muamer Bandić, Elvedin Okerić – Adi Kalem, Jelena Pekić – Faruk Kapidžić, Adi Kalem – Faruk Kapidžić, Muamer Bandić – Faruk Kapidžić, Davor Čičić – Albin Zuhrić, Faruk Kapidžić – Albin Zuhrić, Faruk Selmanović – Albin Zuhrić, Faruk Kapidžić – Miomirka Melank, Haris Zahiragić – Miomirka Melank, Jasmin Šaljić – Miomirka Melank, Samir Avdić, Muamer Bandić – Miomirka Melank, mahir Dević, Vedrana Vujović – Haris Zahiragić, Mahir Dević – Haris Zahiragić, Jasmin Šaljić – Haris Zahiragić i Haris Zahiragić – Redžo Lemezan.*

Ispravku krivog navoda su imali zastupnici: *Vedrana Vikić – Musić – Jasmin Šaljić, Redžo Lemezan – Muamer Bandić, Elvis Vreto – Adi Kalem, Elvedin Okerić – Faruk Kapidžić, Davor Čičić – Haris Zahiragić, Mahir Dević – Redžo Lemezan, Muamer Bandić – Redžo Lemezan, Faruk Selmanović – Samir Avdić, Vedrana Vujović – Samir Avdić.*

Poslovničku intervenciju je imala zastupnica *Belma Kapo.*

Zaključivši diskusije, dopredsjedavajuća Jelena Pekić je obavijestila zastupnike da će pauza za iftar trajati dva sata, te da se sjednica nastavlja u 20,00 sati.

NASTAVAK NAKON PAUZE

U nastavku sjednice nakon pauze, predsjedavajući je zaključio diskusiju obzirom da nije bilo više prijavljenih diskutanata.

Potom je u skladu s članom 94. Poslovnika Skupštine KS predložio, a zastupnici većinom glasova podržali da se izjašnjavanje po ovoj tački provede odmah, (s 21 glas „za“ i 1 glas „protiv“).

Zatim se prešlo na izjašnjavanje po dostavljenim amandmanima.

Amandmani Kluba Demokratske fronte nisu dobili potrebnu većinu.

Amandmani zastupnice Marijele Hašimbegović nisu dobili potrebnu većinu.

Amandmani zastupnice Vedrane Vujović nisu dobili potrebnu većinu.

Amandmani Kluba Stranke demokratske akcije nisu dobili potrebnu većinu.

Amandmani Kluba Stranke za Bosnu i Hercegovinu nisu dobili potrebnu većinu.

Amandmani zastupnica Danijele Kristić i Arijane Memić, nisu razmatrani, na zahtjev zastupnice Memić, jer je Vlada KS prihvatila iste i uvrstila ih u amandmane Vlade KS, za što se zastupnica Memić zahvalila Vladi KS.

Amandman zastupnika Admele Hodžić i Aljoše Čampare nije razmatran obzirom da su zastupnici odustali od istog iz razloga što su resorni ministri našli novac u Budžetu za realizaciju njihovog zahtjeva, za što su se zastupnici Hodžić i Čampara zahvalili.

Predsjedavajući je potom pozvao zastupnike da se izjasne o Prijedlogu Budžeta.

Na osnovu rezultata glasanja, predsjedavajući je konstatovao da je Skupština većinom glasova donijela Budžet Kantona Sarajevo za 2025. godinu. (s 20 glasova „za“ i 4 glasa „protiv“).

NASTAVAK NAKON PAUZE

Realizacija tačke tri.

AD-3.

PRIJEDLOG ZAKONA O IZVRŠENJU BUDŽETA KANTONA SARAJEVO ZA 2025. GODINU

Zastupnici su materijal za tačku dobili uz poziv za sjednicu. Uvodno izlaganje u svojstvu predlagača, podnio je ministar finansija, Afan Kalamujić.

U diskusiji su učestvovali zastupnici: *Marijela Hašimbegović i Damir Marjanović.*

U međusobnom repliciranju su učestvovali zastupnici: *Marijela Hašimbegović - Damir Marjanović.*

Poslovničku intervenciju su tražili zastupnici: *Albin Zuhrić i Jelena Pekić.*

Nakon diskusija, dopredsjedavajući Vibor Handžić je pozvao zastupnike da se izjasne u skladu s Članom 94. Poslovnika Skupštine KS da se o Prijedlogu zakona izjašnjava odmah.

Na osnovu rezultata glasanja konstatovano je da je Skupština jednoglasno prihvatila da se izjašnjavanje o Prijedlogu zakona o izvršavanju Budžeta Kantona Sarajevo za 2025.godinu provede odmah.

Zatim se prešlo na izjašnjavanje o pristiglim amandmanima na Prijedlog zakona.

O amandmanima zastupnice Danijele Kristić se nije izjašnjavalo jer ista nije bila prisutna na sjednici.

Amandmani zastupnice Marijele Hašimbegović nisu dobili potrebnu većinu.

Nakon izjašnjavanja po Prijedlogu zakona o izvršavanju Budžeta Kantona Sarajevo za 2025.godinu, konstatovano je da je Skupština Kantona Sarajevo donijela ovaj Zakon, većinom glasova (s 20 glasova „za“ i 6 glasova „protiv“, bez glasova „suzdržan“).

Realizacija tačke četiri.

AD-4.

PRIJEDLOG ZAKONA O IZMJENAMA I DOPUNAMA ZAKONA O DOPUNSKIM PRAVIMA BORACA BRANITELJA BOSNE - skraćeni postupak

Zastupnici su materijal dobili uz poziv za sjednicu. Uvodno izlaganje u svojstvu predlagača je podnio ministar za boračka pitanja, Omer Osmanović.

Obzirom da nije bilo prijavljenih diskutanata, dopredsjedavajući Handžić je zamolio zastupnike da se izjasne u skladu s Članom 94. Poslovnika Skupštine KS, da se izjašnjavanje po ovoj tački provede odmah.

Nakon izjašnjavanja, konstatovano je da je Skupština jednoglasno podržala da se izjašnjavanje provede odmah. (s 23 glasa „za“).

Nakon izjašnjavanja o Prijedlogu Zakona o izmjenama i dopunama Zakona o dopunskim pravima boraca branitelja Bosne i Hercegovine, konstatovano je da je Skupština jednoglasno donijela ovaj Zakon. (s 25 glasova „za“).

Ministar Omer Osmanović je zahvalio svim zastupnicima što pružaju bezrezervnu podršku radu Ministarstva za boračka pitanja.

Realizacije tačke pet.

AD- 5.

PRIJEDLOG ZAKONA O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM - skraćeni postupak

Zastupnici su materijal dobili uz poziv za sjednicu. Premijer Nihad Uk je podnio uvodno izlaganje u svojstvu predstavnika predlagača.

U diskusiji su učestvovali zastupnici: *Albin Zuhrić, Vedrana Vujović, Marijela Hašimbegović, Jelena Pekić, Elza Gaković, Samir Avdić, Muamer Bandić, Faruk Selmanović i Elvis Vreto.*

U međusobnim repliciranjima su učestvovali zastupnici: *Muamer Bandić – Jelena Pekić, Vedrana Vujović – Jelena Pekić, Davor Čičić – Muamer Bandić, Elvedin Okerić – Faruk Selmanović i Muamer Bandić – Elvis Vreto.*

Ispravku krivog navoda su imali zastupnici: *Muamer Bandić – Elvedin Okerić.*

Po zaključivanju diskusija, predsjedavajući je pozvao zastupnike da se izjasne u skladu s članom 94. Poslovnika Skupštine Kantona Sarajevo, da li su saglasni da se izjašnjavanje po ovoj tački provede odmah.

Nakon izjašnjavanja, konstatovano je da je Skupština većinom glasova prihvatila da se izjašnjenje po ovoj tački provede odmah. (s 23 glasa „za“ i 1 glas „suzdržan“).

Nakon izjašnjavanja po tački, konstatovano je da je Skupština većinom glasova donijela Zakona o izmjenama i dopuni Zakona o socijalnoj zaštiti, zaštiti civilnih žrtava rata i zaštiti porodice sa djecom (s 19 glasova „za“, 6 glasova „protiv“ i bez glasova „suzdržan“).

Realizacija tačke šest.

AD-6.

PRIJEDLOG ODLUKE O IMENOVANJU ODBORA ZA ŽALBE JAVNOSTI SKUPŠTINE KANTONA SARAJEVO

Zastupnici su dobili materijal uz poziv za sjednicu. Predsjedavajući Okerić je u svojstvu predsjedavajućeg Komisije za izbor i imenovanja i administrativna pitanja podnio uvodne napomene.

Obzirom da nije bilo prijavljenih zastupnika za diskusiju, predsjedavajući je predložio da se izjašnjavanje po ovoj tački provede odmah, a u skladu sa članom 94. Poslovnika Skupštine Kantona Sarajevo, što su zastupnici većinom glasova podržali, (s 23 glasa „za“, 2 glasa „protiv“ i bez glasova „suzdržan“).

Nakon izjašnjavanja, konstatovano je da je Skupština većinom glasova donijela Odluku o imenovanju Odbora za žalbe javno Skupštine Kantona Sarajevo, (s 19 glasova „za“, 4 glasa „protiv“ i 2 glasa „suzdržan“).

Realizacija tačke sedam.

AD- 7.

PRIJEDLOG ODLUKE O DAVANJU SAGLASNOSTI ZAVODU ZA IZGRADNJU KANTONA SARAJEVO ZA POKRETANJE POSTUPKA OTPISA ZAKONSKIH ZATEZNIH KAMATA, UZ OBAVEZU IZMIRENJA GLAVNOG DUGA I TROŠKOVA SUDSKOG POSTUPKA

Materijal za ovu tačku je dostavljen zastupnicima uz poziv za sjednicu.

Zastupnici su smatrali da nema potrebe za uvodnim izlaganjima, nije bilo prijavljenih za diskusiju, pa se odmah prešlo na izjašnjavanje po tački.

Nakon izjašnjavanja, konstatovano je da je Skupština većinom glasova donijela Odluku o davanju saglasnosti Zavodu za izgradnju Kantona Sarajevo za pokretanje postupka otpisa zakonskih zateznih kamata, uz obavezu izmirenja glavnog duga i troškova sudskog postupka, (s 18 glasova „za“, 2 glasa „protiv“ i 2 glasa „suzdržan“).

Predsjedavajući je konstatovao da su sve tačke dnevnog reda iscrpljene, te je zaključio rad na 21. Radnoj sjednici, zahvalivši se zastupnicima na konstruktivnom radu. Također je čestitao nastupajući praznik Bajram uputivši prigodne riječi tim povodom svim građanima Kantona Sarajevo i BiH.

Broj: 01-04-9170/25
28./29.03.2025.godine
SARAJEVO

Zapisnik izradila:

Lejla Kadrić

S E K R E T A R
SKUPŠTINE KANTONA SARAJEVO

Aida Zeković

P R E D S J E D A V A J U Ć I
SKUPŠTINE KANTONA SARAJEVO

Elvedin Okerić

- 0 -

**Sastavni dio ovog zapisnika su stenografske bilješke, audio snimak sjednice, koji se čuvaju u
Službi za skupštinske poslove Skupštine Kantona Sarajevo.**